



Pranimi / Dorezimi Punimi/Protokolli Received/Delivered	22-12-2022	2	viti god year
Organi/Aljezia Organ/Jedinita Org./Unit	Bi/Prof Bi/Prof Prof.No	Shtojca Prilog Appendix	Sasia Kolicina Quantity
SPIMSHK	8368/2022		114



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.1032/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Eshref Shabani dhe Malsore Gashi-Bajraktari-anëtarë, me Avdyl Bekteshi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën me numër A.nr.1032/2022 të datës 21.11.2022 të parashtruar nga ankuesi kundër organit të punësimit Komuna e Gjakovës, në çështjen juridike “Shkelje e të drejtës në pagë”, duke vepruar në pajtim me Nenin 6 paragrafin 1 nënparagrafin 1.1, nenin 16 paragrafi 3 dhe nenin 18 paragrafin 1 nën paragrafin 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 22.12.2022, njëzëri, mori këtë:

V E N D I M

- I. *Aprovohet si e bazuar* ankesa me numër A.nr.1032/2022 e datës 21.11.2022 e parashtruar nga ankuesi
- II. *Obligohet* Kryetari i Komunës së Gjakovës, që brenda afatit prej pesëmbëdhjetë (15) ditësh nga data e pranimit të këtij vendimi, të inicioj veprimet e nevojshme ligjore për harmonizimin e koeficientit të nëpunësit civil Blendi Shasivari nga koeficienti gjashtë (6) në koeficientin tetë (8).
- III. Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim lidhur me veprimet e ndërmarra për zbatimin e këtij vendimi.

A r s y e t i m

Ankuesi punësuar në Komunën e Gjakovës, më datë 21.11.2022 ka parashtruar ankesën me numër protokollit 7253/2022 në Këshillin e Pavarur Mbikëqyrës për Shërbimin Civil të Kosovës, kundër përgjigjes me numër reference 01-120/01-26053 të datës 16.11.2022 të menaxherit të Burimeve Njerëzore të Komunës së Gjakovës lidhur me kërkesën e ankuesit për harmonizim të koeficientit të pagës nga koeficienti gjashtë (6) në koeficientin tetë (8).

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, më datë 25.11.2022 ka

proceduar kërkesën për përgjigje në ankesë në Komunën e Gjakovës. Ndërsa, kjo e fundit më datë 29.11.2022 ka përcjell shkresat lidhur me çështjen në procedurë të vendosjes.

Kolegji për Shqyrtimin dhe Vendosjen e Ankesave, për vërtetimin e plotë dhe të drejtë të gjendjes faktike si dhe vendosjes në mënyrë meritore, ka administruar këto prova: Ankesën me numër të protokollit 7253/2022 të datës 21.11.2022 të parashtruar nga ankuesi në Këshillin e Pavarur Mbikëqyrës për Shërbim Civil të Kosovës; Kërkesën për harmonizim të koeficientit të pagës me numër protokollit 01-120/01-26053 e datës 15.11.2022 e parashtruar nga ankuesi tek Menaxheri i Njësisë së Burimeve Njerëzore; Përgjigjen në kërkesë me numër 01-120/01-26053 të datës 16.11.2022 nga Komuna e Gjakovës; Akt Emërimit me numër të protokollit 01 nr.112.143/19 të datës 02.05.2012; Akt Emërimit me numër të protokollit AE.Nr.01-112/01-37870 të datës 16.12.2021; Akt Emërimit me numër të protokollit AE.Nr.01-112/02-37481 të datës 14.12.2021 e V.D; Akt Emërimit me numër të protokollit AE.Nr.01-112/01-37889 të datës 16.12.2021 e S.A; Vendim A.nr.771/2022 i Këshillit të Pavarur Mbikëqyrës për Shërbimin Civil të Kosovës; Zarin e datës 17.11.2022; Kërkesën për përgjigje në ankesë me numër të protokollit 7399/2022 të datës 25.11.2022; Përgjigjen në kërkesë me numër të protokollit 7475/2022 të datës 29.11.2022 nga Komuna e Gjakovës; Përshkrimi i detyrave të punës e datës 01.11.2018 për Inspektor i Shërbimeve Publike; Lista e pagave për muajin tetor dhe shtator 2022; Kërkesën për informata e datës 09.11.2022 nga I.M për Sh.Leci; Përgjigje me numër protokollit 7005/2022 e datës 10.11.2022 nga Departamentin për Menaxhimin e Zyrtareve Publike; Kërkesën e datës 19.12.2022 nga S.A për A.F dhe Përgjigjen me numër protokollit 8246/2022 e datës 20.12.2022 nga Departamentin për Menaxhimin e Zyrtareve Publike.

Kolegji për Shqyrtimin dhe Vendosjen e Ankesave pasi ka shqyrtuar çdo provë veç e veç dhe të gjitha provat së bashku, si dhe bazuar në rezultatin tërësishëm të shqyrtimit administrativ, konstatoi se është e bazuar ankesa e ankuesit, **SEPSE**:

Nga administrimi i provave materiale rezulton se ankuesi është i punësuar në Komunën e Gjakovës, gjegjësisht i njëjti ushtron pozitën e punës *Inspektor i Shërbimeve Publike*, , në Drejtorinë për Punë Inspektuese, klasa profesional 1, me koeficient gjashtë (6) të pagës.

Ankuesi me datën 15.11.2022 ka parashtruar kërkesë të Menaxheri i Burimeve Njerëzore në Komunën e Gjakovës për harmonizim (ngritje) të koeficientit të pagës nga gjashtë (6) në koeficientin tetë (8), ndërsa Menaxheri i Burimeve Njerëzore në Komunën e Gjakovës përmes shkresës me numër reference 01-120/01-26053 të datës 16.11.2022 ka refuzuar aprovimin e kërkesës së ankuesit për harmonizim të koeficientit, me arsyetimin se nivelizimi i pagave është problem në nivel vendi, andaj edhe miratimi i Ligjit të Ri të Pagave do të ishte zgjidhje për të gjithë.

I pakënaqur me përgjigjen e Menaxherit të Burimeve Njerëzore, ankuesi me datë 21.11.2022 ka parashtruar ankesë në Këshillin e Pavarur Mbikëqyrës për Shërbim Civil të Kosovës me pretendimin pretendon që ti bëhet harmonizimi i koeficientit nga koeficienti aktual gjashtë (6) në koeficientin tetë (8), ashtu sikurse kolegët tjerë të Komunës së Gjakovës të cilat kanë pozitë të njëjta të punës.

Lidhur me pretendimin e ankuesit për harmonizim të koeficientit të pagës, Kolegji i Këshillit i'u referua nenit 19 të Ligjit Nr.06/L-114 për Zyrtarët Publikë më të cilin është përcaktuar se: "*Zyrtari publik ka të drejtë në pagë dhe shpërblim për punën e kryer si dhe shtesa të përcaktuara me Ligjin e Pagave*", si dhe nenit 3 paragrafit 2 të Ligjit Nr.03/L-147 për Pagat e Nëpunësve Civilë më të cilin parashihet



se: "Institucionet e administratës publike të Republikës së Kosovës janë të detyruara të paguajnë pagë të njëjtë për punën me vlerë të njëjtë". Andaj, mbi këtë bazë ligjore e nisur nga konstatimi si më lartë se ankuesi është emëruar në pozitën për pozitën e Inspektorit të Shërbimeve Publike me koeficient gjashtë (6) të pagës klasa profesional 1, si dhe duke u bazuar në shkresën e datës 19.08.2022 dhe 20.12.2022 të Departamentit për Menaxhimin e Zyrtarëve Publik si organ përgjegjës për përgatitjen dhe mbikëqyrjen e zbatimit të politikave për pagat e zyrtarëve publikë, me të cilin është konfirmuar se pozita inspektor-klasa profesionale 1, ka të përcaktuar koeficientin tetë (8) të pagës, Kolegji i Këshillit konstaton së pretendimi ankimor i ankuesit për harmonizimin të koeficientit të pagës me titullin e punës është i drejtë dhe i ligjshëm.

Për me tepër, Kolegji duke u bazuar në provat e lëndës ka gjetur se Komuna e Gjakovës aplikon koeficient të ndryshëm të pagës lidhur me pozitat që hyjnë në kuadër të kategoritë profesionale respektivisht klasës profesionalë 1, gjegjësisht sipas Akt Emërimit me numër të protokollit AE.Nr.01-112/02-37481 të datës 14.12.2021 nëpunësit civil V.D në pozitën Zyrtar i Lartë për Buxhet dhe Financa ka të përcaktuar koeficient shtatë pikë pesë (7.5), ndërsa sipas Akt Emërimit me numër të protokollit AE.Nr.01-112/01-37889 të datës 16.12.2021 nëpunësi civil S.A në pozitën Zyrtar i Lartë për Ekonomi ka të përcaktuar koeficientin tetë (8) të pagës, rrjedhimisht mbi bazën e këtyre fakteve rrjedhë së zbatimi i koeficienteve të ndryshme të pagës për pozitë kategorisë/klasës së njëjtë të punës brenda institucionit të njëjta punëdhënës paraqet trajtim jo të drejtë dhe diskriminues të ankuesit, ashtu siç është përcaktuar me nenin 4 paragrafi 1 Ligjit Nr.05/L-021 për Mbrojtje nga Diskriminimi ku thuhet se: "Diskriminimi i drejtpërdrejtë konsiderohet kur një person trajtohet në mënyrë më pak të favorshme sesa trajtohet, ka qenë i trajtuar ose do të trajtohet një person tjetër në një situatë të krahasueshme, sipas një apo më shumë nga bazat e përcaktuara në nenin një (1) të këtij Ligji, dhe se trajtimi jo i barabartë i të punësuarve në kuptim të së drejtës së pagës është në kundërshtim të plotë edhe me nenin 7 paragrafi 1 të Ligjit për Zyrtarët Publikë më të cilin është përcaktuar se: "1. Menaxhimi i marrëdhënies juridike me nëpunësit civilë, me nëpunësit e Shërbimit Publik dhe me nëpunësit administrativo-technikë dhe mbështetës, udhëhiqet nga ligji dhe bazohet, gjithashtu, në parimin e mundësive të barabarta, meritës, transparencës, profesionalizmit dhe paanësisë politike, mos diskriminimit, përfaqësimit të drejtë gjinor dhe të komuniteteve dhe synon garantimin e qëndrueshmërisë dhe vazhdimësisë në detyrë..." Kolegji i Këshillit konstaton së pretendimi ankimor i ankuesi për harmonizimin të koeficientit të pagës me titullin e punës është i drejtë dhe i ligjshëm. Kështu që bazuar në këto rrethana, Kolegji i Këshillit konstaton së në ketë çështje administrative janë përmbushur kushtet ligjore për aprovimin e tërësishëm të ankesës së ankuesit duke i dhënë të drejtë ankuesit për rregullimin e koeficientit të pagës nga gjashtë (6), në tetë (8), për pozitën e punës "Inspektor i Shërbimeve Publike".

Siç u theksua me sipër, Kolegji duke u bazuar në nenin 18 paragrafin 1 nën paragrafin 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, vendosi si në dispozitiv të këtij vendimi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.1032/2022.

Avdyl BEKPESHI

Avdyl Bekpeshi
Procesmbajtës



Vendimi i dërgohet:

- *Ankuesit*
- *Kryetarit të Komunës së Gjakovës;*
- *Udhëheqësit të Personelit në Komunën e Gjakovës; dhe*
- *Arkivit të KPMSHCK-së.*